

萬有文庫

第二集七百種

王雲五主編

曝書亭集

(二)

朱彝尊撰

商務印書館發行

曝書亭集

(二)

朱彝尊撰

萬有文庫

第二集七百種

總編纂者
王雲五

商務印書館發行

曝書亭集卷第一

賦

謁孔林賦

秀水 朱彝尊 錫鬯

粵以屠維作噩之年。我來自東。至於仙源。斯時也。壇杏花繁。庭檜甲坼。元和之犧象畢陳。闕里之榛蕪盡闢。既釋菜於廟堂。旋探書於屋壁。乃有百石卒史。導我周行。牽車魯城之北。縹馬洙水之陽。卽大庭之遺庫。循端木之故場。駟孫祔兮居前。聖子藏兮在左。自黃玉之封緘。闔幽宮而密鎖。隕長鯨兮不驚。懾祖龍兮遠禍。除荆棘之叢生。罕翔禽之飛墮。雨露既濡。遲景東隅。整衣裳之肅肅。正顏色之愉愉。展謁方終。誕尋往蹟。超百兔之深溝。撫青羊之臥石。爰有草也。苞著其名。守之以龜。一本百莖。我求其德。洵圓且靈。爰有木也。題之以楷。非柏非樅。靡癭靡廐。歷千禩而長新。貫四時而不改。惟先師之遺澤。道莫著乎六經。配光華于日月。若迭奏之琴箏。降而後儒。各事采獲。中文古文之書。先天後天之易。目鄭衛以淫邪。誣春秋以深刻。藐往哲之嘉謨。恆末師之是則。滔滔天下。後死其悲。安得起素王於泉壤。操筆削而正之。我思古人。恥同汚俗。或六聘而收身。或三詔而逃祿。或依李充之山。或就張超之谷。潛戶壁于服虔。變姓名于梅

福入源水兮栽桃。隱丹霞兮種竹。詎如此地。桑海不遷。可游可息。有歌有絃。耳不聞僧尼之魚板。目不覩旗鼓之樓船。樂土樂土。速營一廛。願爲林戶。躬耕墓田。庶幾近聖人之居。讀聖人之書。將不得爲聖人之徒也與。

春蒐賦

皇帝御宇十有八年。握金鏡。運玉璇。超百王之聖域。漱六藝之神淵。德無遠而勿屈。聲有濯而彌宣。舞兩階之干羽。靖萬里之戈鋌。雨洗炎洲之瘴。波澄閩海之煙。聿將秩祀。衡岳底定。巴滇猶克。嚴夫武事。洵無逸而有虔。乃命僕臣。乃召司馬。選丞徒以大蒐。諏吉日於小雅。晉鼓則百二咸陳。虞旌則東西來下。車鏤象以煊爛。馴飛黃而白赭。風清紫陌之塵。天闊黃圖之野。於是乎駕六馭。從百官。建九旂。總三單。經長楊。陟上蘭。遵路直。從橋安。歷平原之膺膺。瞻秀木之丸丸。雲霏霏兮五色。山磊磊兮層巒。斯時也。穀雨新晴。暮春之序。劍乍捧乎金人。觴甫浮於鶴羽。亞繁杏兮山郵。舒崇桃於野圃。藥苗則的的依闌。莒葉則青青被渚。粉颺鳳子之衣。綠潤桐孫之乳。雉角角兮晨飛。鳥啞啞兮晚翥。兔趨趨兮淺草之叢。鹿呦呦兮平林之塢。爾乃刷靈鬣。騰風鬣。擊鶯鳥。搏穀蟲。落驚雌。駭高雄。輕裘兮不御。暄景兮方融。釋其一面之網。射以九和之弓。三驅兮四牡。一發兮五豨。於焉斂綏章。徹表貊。張幔城。羅藻幣。息蔭乎高林。容與乎秀澤。數獸計鮮。犒勤讚獲。大庖不盈。乾心有懌。用訓儉而昭仁。豈丘崇而山積。調六膳而作甘。飲三漿其如液。則有

飛龍之舸。鳴鶴之舟。梁排雁齒。水漲鴨頭。和迴波之妙曲。詠在藻於中流。沙停振鷺。擢起眠鷗。白魚湧躍。黃鵠翔留。勝昆明之習戰。與華林之沂遊。於是川后效珍。河宗輸寶。山出醴泉。地生朱草。鐫十鼓於岐陽。列三山於蓬島。天子師湯文之裕民。法軒轅之訪道。省四野之耕農。問百年之耆老。照華薄以春曦。浹恩膏於靈沼。爭擊壤兮康衢。永銷兵兮海表。在昔成王繼序。四征弗庭。既巡侯甸。萬國咸寧。暨漢文帝。邊宇肅清。猶選良家於六郡。躬戎服而治兵。稽春蒐之盛禮。允治世之大經。豈其賓客是燕。乾豆是營。惟居安而必慮。斯坐致夫太平。敢擬廣成之頌。用垂休美之聲。

太極圖賦

原夫黃牙欲發。蒼精未垠。一氣融結。萬象胚渾。馮馮翼翼。烟烟熅熅。睢睢盱盱。縣縣分分。既龐鴻之莫兆。何聲臭之可聞。量則包夫清濁。質斯合乎昭昏。謂虛無而有象。運妙有而無鄰。鴻靈幽紛。泰貞蠢闢。混成天地之先。互藏陰陽之宅。觀動靜兮無端。占迴游兮不隔。譬水車之恆轉。類果核之未坼。爾其理則貫一。象實函三。白麟之書莫吐。赤雀之籙未銜。名雖傳乎十翼。義尙晦乎周聃。啓華山之妙蘊。藉營道之幽探。种穆祕師授之說。朱陸滋異同之談。至希至微。無偏無側。一翕一施。半白半黑。外若離缺。中如含薏。萬物於焉化生。五行之所糾纏。成能設位。圖往鏡來。化一氣甄三才。天根啓。月窟開。悟儒言於冥蹟。允經學之倫魁。乃知聖人能備全體。先知可詔後覺。大道爲事物之母。天子有簡能之學。用廣運而不窮。信範圍之

非邈。願永繪於丹扆。方金鑑之在握。

夜明木賦同澤州陳侍郎作

皇帝避暑於興州。時維昭陽大淵獻之秋。尋捺鉢之舊蹟。啓帳殿於仙陬。六屯內肅。千廬外周。雲容容兮四合。水泱泱兮交流。風颯颯兮徐來。雨霏霏兮乍收。爰有物焉。星芒遙逗。明滅露螢之尾。吐吞火雞之味。謂野燒而不延。疑神燈而未輟。迺命俞騎。卽而視之。是爲廩木。有杙無枝。黝同梓炭。澀若榴皮。如場之轉碌礪。如絳之拽豐碑。載以堅車。駕之健犢。入重關。度平谷。選郢匠以運斤。俾奄人以司局。舍科上槁。存堅多心。近天顏兮咫尺。位祕宇之崇深。鑽不勞兮司燿。燎無灼兮烘燼。等壁夜光。類珠宵映。方角枕而輝盈。比風簾而神定。四照儷若木之華。六宮擬賓連之慶。豈非聖德之咸臨。固無遠而弗鏡。宜坤珍之畢效。雖枯木朽株。亦疇德而瑞聖。

省方賦

歲在甲子。歷應上元。聖化翔洽。東汜西崑。九州之外郡縣。重譯而至橋門。嘉穀駢穗。濁河激源。於時山祇望幸。臣庶上言。請欽紫以郊岱。或奉符而封巒。天子思省方以設教。用求莫而監觀。踐六十四民之遙迹。省七十二后之彌文。吉日旣諏。德音斯布。蠲六軍所過之租。減四方惟正之賦。推湛恩於槐宸。霈解澤於棘路。神人交贊。遐邇樂附。願儲祉以慶成。共希光而景鶩。迺以九月辛卯。農事備收。七驕始駕。百工方休。

扈千官於行所。勒五營於道陌。既伯旣禱。爰豫爰遊。承曲璫之璇蓋。建太常之辰旒。導以金鉦瓊鉞。驗以紫燕玉蚪。鳴葭而雲韶並和。駐罕而星廬外周。黃圖三輔。青壤千里。濟甬津以無波。履平原其如砥。則有單椒秀澤之山。側坎飛輪之水。橋號鵲華。湖名蓮子。踰歷下之舊城。尋介丘之遺趾。美哉左海山。有岱宗。閭啓仙人之石。官存大夫之松。天雞鳴而躍日。宸駕至而呼嵩。微稽席蒲車之制。罷泥金檢玉之封。於焉訪淮土之仙茅。驗吳門之白馬。渡河則神獻其寶。遵海而風不鳴瓦。泛藻舟於中流。息參旗於大野。越南竟與南徐。溯吳下而白下。帝有恩言。宣示函夏。眺勝國之蒿萊。封蔣陵之松楨。德無施而不徧。恩未沾者蓋寡。由是展軫素王之里。致齋金絲之堂。陳元和之犧象。循闕里之宮牆。懸車在廟。遺硯在牀。肅拜杏壇之上。翔步檜庭之旁。洵禮隆乎三古。而事冠乎百王。衡律旣同。秩祀有典。振旅則邇。考祥斯遠。覽四瀆而經五州。乍六旬而還輦。兩宮交悅。萬姓齊忭。粵若稽古。時致太平。必命掌故。登封告成。或紀社首。繹繹。或禮云云亭。亭。石城石距之狀。金匱玉匱之形。祺安禪安之樂。封壇覲壇之銘。莫不雲連帳殿。雷動山庭。未有諮詢疾苦。彰瘴濁清。不警不蹕。不震不驚。凡高年之耆老。尺口之童嬰。婦子所集。商旅所經。咸得覲天顏於咫尺。瞻仙仗於郊垌。至若天縱之能。溢於筆墨。月璧星珠。寶題靈式。鸞蹤鳳藻。被物成飾。轢唐帝之八分。陋宋宗之飛白。扁榜峩峩。發舒心畫。蔭之華棖。勒之貞石。誠與日月雲漢共昭。垂於無極者也。

湘湖賦

歲柔兆困敦兮。是月維陽。辭鑑水之一曲兮。言歸故鄉。遵大路于蕭山兮。猶勾踐之舊疆。舍予舟于城闕兮。別問渡于陂塘。踐荒塗之幽辟兮。山是越而湖湘。圍列岫之周遭兮。匯一水于中央。蓴絲苳帶。齊消歇兮。澄百頃之波光。相茲湖之寥闊兮。溯蒼蒼之葭葦。漾輕舸而如所兮。逾五里而十里。鮮澤農之耕作兮。但眾師之棲止。雉角角以飛鳴兮。鷺娟娟而停峙。瞻牛頭與苧蘿兮。信不遠而伊邇。愛山川之清淑兮。斯生長夫西子。洵明豔之絕倫兮。直夫差之一死。以餘暨爲諸暨兮。驗往牒之非是。眺越王之故嶂兮。丁國步之屯遭。會稽不可保兮。稱臣妾而播遷。洊臨江而祖道兮。奏哀曲于烏鳶。迨返國而渡三津兮。惟八臣四友謀猷之後先。旣十年而生聚兮。更教訓之十年。簡俊士之四萬兮。率君子之六千。誕一舉而沼吳兮。齊衣錦而師旋。讎九世而當復兮。豈身恥辱而忘焉。志旣立而轉死爲霸兮。胡後之人獨不然。他山難久留兮。問西陵而前路。夕旣濟于錢唐兮。尙踟躕而迴顧。徒弔古而慨慷兮。惜年歲之遲暮。

水木明瑟園賦并序

僕生平不耐作賦。雖以賦通籍。非稱意之作不存也。康熙甲申八月。陸上舍貽書相要。過上沙別業。遂汎舟木瀆。取道靈巖以往。抵其閭。則吳趨數子在焉。愛其水木明瑟。取以名園。上舍延賓治具。飲饌豐潔。主客醉飽。留七日乃還。念勝引之難再也。成賦一篇。先民有言。人各有能有不能。賦非僕之所能也。辭曰。度十畝之地。葺宅一區。泚有阡而可越。潭分沙而不淤。剪六枳而櫟藩。因雙樹而關閭。嘉水木之明瑟。愛

徑畛之盤紆。山有穴而成岫。土戴石而名岨。譬兩判而得路。蓼四照兮盈株。園之主人。則陸生積也。匪聲利是趨。惟古訓是茹。鼓枻而吟。帶經以鉏。不隱不仕。無礙無拘。良辰既撰。爰遣莊奴。筆疏告吾。商飈乍肅。赫暑早祛。葵傾芳步。柰秀華芙。桂英粟綻。阜莢條麤。茗縛厥帶。鑱刈其蕪。井汲餅紆。牀轉轆轤。靡塵不滌。靡穢不除。可以譚讌。可以歌歆。夫子惠顧。跼蹐無虞。於是竹垞一叟。誕發僧廬。遵彼橫塘。津逮岑隅。風塘傘竹。日漏衣櫺。亦有同調數子。素心相於。水抽其帆。陸柅其車。不速而集。語笑軒渠。雖坐貫坐。或跣或趺。生也。敕中廚。封兩糲。誠食饌之次第。傳方法于腰胸。乃羹乃淪。間以臠脍。蔌則有蒲。鮮則有菹。壁翠房之鮮蒨。剝紫芡之員珠。旋棊改令。覆斗傾盂。倒季路之十榼。慕宣尼之百觚。生起避席。顏色敷愉。稱園雖小。聊可以娛。夫子賦之。可歟否歟。叟曰可哉。吾思魯鈍。母疾而徐。於焉閉關納屨。自晨及晡。拂几案。屏翫。飮挹勺水。注蟾蜍。默聳羸肩。潛捋短鬚。雖有千慮。終成一愚。譬諸奏事。四足而非馬。書券三紙。而無驢。爾乃舍左思之席溷。投鍾繇之筆楮。循蘭陔。踐椒塗。踞聽雨之樓梯。登升月之窗窻。流覽帷林。蕩漾方壺。心傾意寫。志豁神攄。留宿宿兮信信。忽便便兮諸諸。而曰。猗茲園之怡曠兮。經夫差之故都。駐我馬于高岡兮。想越來之師沼。吳傷西子之不作兮。徒憑弔于交衢。聆寶屨而聲銷兮。剩紅心之草鋪。嗟宮牆流水之入兮。驗妖夢之非誣。既上山而下山兮。復自田而之湖。回瞻巖椒之夕陽兮。挂霄漢之浮圖。逼茶隴之葱青兮。占稻田之豐腴。耘雖資乎疆以兮。穫免發彼租符。眺松皋之明秀兮。步衡薄而踟躕。辭八門與七堰兮。


遠肥膩之姑蘇。望之叢叢蓊鬱。卽之羅羅清疎。旣外隈而內隩。亦前濱而後沮。磴希偏側。丘不崎嶇。澗無
 飲虎。穴少潛狙。石梁緩度。坦坦舒舒。春則桃殷李縞。夏則筍白櫻朱。薈一丈兮爛漫。香五木兮紛敷。架層
 闌之曲彙。刺不慮夫牽掣。又有同心宿蕙。並蒂新蕖。未八月而剝棗。先九日已囊萸。野芳斷兮復續。湛露
 晞兮更濡。訝鵲鵲之撲鹿。縱烏鳥之畢逋。喈喈楚雀。汎汎江鳬。雀則有穀。鳬則有雛。翠羽定巢。而不去。文
 鱗在藻。而忽徂。非無牛宮豚欄。麋羖兔置。羝藩鹿砦。雉艾雞筵。螭蟹設籩。鱣鮪施罟。寧寬便了之僮約。而
 免責其辛劬。彼玉山之仲瑛。暨光福之良夫。連峰列岫。夾澗通瀟。豈若斯之一丘一壑。不見其隘。而祇見
 其有餘。且客獨不聞茲園經理之初邪。曩有高士。蜚遁山嶠。屨穿東郭。面垢左徒。垂蘆簾于紙閣。然莢葉
 于瓦墮。朋情迎兮勿送。戶罷闔而不逾。柏雖生兮上槁。桐已醞而无膚。斯人去兮猿鶴散。幸茅亭之尙在。
 對魚幢之咫尺。而轉覺其空虛。生乃取介白之遺字。
吾鄉徐高士白舊居于此上舍請岬山
徐吉士昂發大書介白之亭扁縣之縣擘窠之大
 書。志先民之軌躅。作後學之範模。豈非仁心仁術。視富貴利達買宅者攸殊。今吾與諸子飲食宴樂于此。
 倡予和女。安知後之游者。觀題壁之作。不曠世而相感。誦清風之穆如。重爲告曰。四坐莫誼。吾言不渝。諸
 君卜築。近在郊郭。吾獨寥寥。栖小長蘆。目極百里。何山可居。相生之宅。其樂只且。兄分布被。母御板輿。婦
 采蘋而采蘩。子耕菑而耕畬。烹泉則京挺都監並載。入市則修琴賣藥非迂。郊關一舍。而近津渡。扁舟可
 呼。行不苦于趨。起策不藉乎翼扶。我舟弗勞。我僕免痛。訪翠墨而椎拓。揭黃卷而流輸。凡靈威所守。唐述

之儲莫不籤題置笥。裝界開圖。爾雅釋寓。齏之屬。離騷箋草木之疏。僕雖耄矣。耽與道俱。奇文疑義。猶冀相須。友直友諒。爲德不孤。思載家具。旁生層櫨。卜鄰晨夕。我與爾夫。

構李賦并序

嘉興古之構李也。構遵爲切。許慎說文解字。從木有所構。賈思勰嫁李法。臘月中以杖微打岐間。正月復打之。足子殆擣之義與。府治西南二十里。舊有構李城。今蕪沒。李惟縣東□十里淨相寺有之。近苦官吏需索。寺僧多伐去。將來慮無存矣。考之圖經俱不載。因體物成篇。辭曰。

植物有李兮。應玉衡之星精。受命南國兮。特以構名。產維揚吳會之交兮。載于魯春秋之經。旣殊河沂之黃建兮。亦不類房陵之縹青。夙傳九標之稱。允宜五沃之土。自空城之蕪沒。遷淨相之梵宇。獲要術于齊民。授靈方于老圃。甄著樹以分岐。犁不耕而用拊。當其溫風始至。法苑徐開。井上勿遺糟食。林間恰有禽來。價方高乎朱仲。種不讓夫顏回。果熟偏蕃。枝低易拜。漿均玉乳之梨。品勝紅雲之柰。相珍果之離核。縣弱縷而虛中。異懷仁之桃杏。必待嫁而分叢。宜登玉盤。宜沉冰水。雪素薄而並陳。配甘瓜而兩美。傳諸故老。一事矜奇。遇入吳之西子。臙脂之匯舟移。經纖指之一掐。量心賞之在斯。何造物之工巧兮。化千億于來茲。雖彼美之云亡兮。髣髴若或覩之。人情重故鄉兮。雖小物而增慕。矧俊味之得嘗兮。信土產之有素。恨圖經未之及兮。迺宣豪而作賦。



曝書亭集卷第二

古今詩一

旃蒙作噩

村舍二首

村舍。朱生感遇作也。生年十七。爲贅壻。避兵五兒子橋。

村舍有牛宮。架以曲尺木。牀牯盈四三。戀此共泥伏。牧童驅使行。跨之上原陸。日夕齊下來。各自舐其犢。吾生命不辰。早歲去邦族。父母謂他人。安敢望拊畜。吁嗟犢不如。寢訛從所欲。村舍有雞棚。樹近蓬門樞。曉日披其樊。一雌將衆雛。村嫗導之前。握粟呼朱朱。當前或更却。母啄子必俱。吾生早離家。南北忽相踰。父母謂他人。衆中益羈孤。吁嗟雞不若。骨肉長相須。

夏墓蕩二首

夏墓蕩前停釣輪。荒溝極浦易迷津。夕陽滿地北風起。飛遍蘆花不見人。干戈靜處見漁師。羨爾花源信所之。豈意叉魚艇子集。殺機不異銳頭兒。

過丘生

丘生避地夏湖曲。獨伴流泉結書屋。茅柴酒薄留故人。破甑夜燒風折木。

柔兆閣茂

曉入郡城

輕舟乘間入。繫纜壞籬根。古道橫邊馬。孤城閉水門。星含兵氣動。月傍曉煙昏。辛苦鄉關路。重來斷客魂。

悲歌

我欲悲歌。誰當和者。四顧無人。笑笑曠野。

過吳大村居

泛舟經谷口。迢遞入林端。一徑野煙夕。孤村返照寒。榴花赤瑪瑙。竹色青琅玕。滿酌主人酒。休歌行路難。

漫感

淮陰昔未遇。旅食昌亭年。薄俗愛惜費。晨炊固宜焉。哀哉趙元叔。日歎囊無錢。男兒雖落魄。寧受衆目憐。相逢游俠子。白馬黃金鞭。揖我入酒家。飲我斗十千。臨觴忽不御。拔劍心茫然。

暝

暝投人外宿。桑柘藹陰陰。獨樹歸禽少。平川隱霧深。松篁初月上。鐘磬夕陽沉。漸覺微風起。寥寥山水音。

平陵東

平陵東。蒿艾蓬。爾爲誰。劫義公。攢者金。伐者鼓。縛義公。大旗下。帳前力士頭。虎毛傳呼欲下五尺刀。如可贖。君歸賣白馬。我歸賣黃犢。

強圉大淵獻

捉人行

步出西郭門。遙望北郭路。里胥來捉人。縣官一何怒。縣官去。邊兵來。中流簫鼓官船開。牛羊橐駝蔽原野。天風蓬勃飛塵埃。大船義義駐江步。小船捉人更無數。頽垣古巷無處逃。生死從他向前路。沿江風急舟行難。身牽百丈腰環環。腰環環。過杭州。千人舉擢萬人謳。老拳毒手爭毆逐。慎勿前頭看後頭。

馬草行

陰風蕭蕭邊馬鳴。健兒十萬來空城。角聲嗚嗚滿街道。縣官張燈徵馬草。階前野老七十餘。身上鞭扑無完膚。里胥揚揚出官署。未明已到田家去。橫行叫罵呼盤殮。闌牢四顧搜雞豚。歸來輸官仍不足。揮金夜就倡樓宿。

北邙山行

北邙山前望行路。素車白馬紛朝暮。誰家丘墓樹龍從。白楊粉檟松柏桐。黃金爲臯石爲馬。魚燈熒熒照泉下。古碑崩剝無歲年。後人於此犁爲田。雄狐僂僂免嬰嬰。人聲夜哭烏聲樂。

春晚過放鶴洲

聞訊裴公島。春來幾度遊。古牆修竹上。潭水落花浮。煙雨無人境。山泉放鶴洲。鷗夷今不見。往事問漁舟。

雨後卽事二首

暑雨涼初過。高雲薄未歸。泠泠山溜遍。淅淅野風微。日氣晴虹斷。霞光白鳥飛。農人乍相見。歡笑款柴扉。

野外

野外疎行跡。深林客到遲。江湖殊後會。風雨惜前期。秋草飛黃蝶。浮萍漾綠池。南樓夜吹笛。寥落故園思。

舟經震澤

澤國東南遠。樓船舊荷戈。明霞開組練。惡浪走蛟鼉。橫海將軍號。臨江節士歌。重來已陳跡。歎息此經過。

著雍困敦

董逃行

我欲上登崆峒。謁見仙人韓終。兩驂白鹿雲中。輕車超忽西東。駕者何人木公。旁有千載玉童。耳長覆髮。丰茸。天門闔者蘇林。復開闔闔招尋。青藍紫桂成陰。清風細雨吹襟。提壺設席盍簪。蒼龍白虎交臨。投壺六博無方。中筵促坐芝房。有美一人清揚。輕軀暢舞洋洋。宛若龍游鵠翔。清歌妙曲難忘。四坐歡樂未央。